



## VIII GOVERNO CONSTITUCIONAL

---

### **Dekretu-Lei n.º 30/2020** **husi Loron 30 Fulan-Abril**

#### **Kria suplementu remuneratóriu ba funsionáriu, ajente no traballadór sira husi administrasaun pública ne'ebé hala'o sira nia atividade profisionál iha servisu prevensaun ka kontrolu COVID-19 ka iha kondisaun espozisaun direta ba vírus SARS-Cov2**

Liu husi Dekretu husi Prezidente Repúblika n. 29/2020, loron 27 fulan-marsu, deklara estadu emerjénsia iha Repúblika Demokrátika Timor-Leste nian, ho fundamentu iha ezisténcia situasaun kalamidade pública.

Situasaun kalamidade pública ne'ebé sai fundamentu ba deklarasaun estadu emerjénsia bazeia ba risku ne'ebé pandemia COVID-19 representa ba saúde pública, ne'ebé diagnostika ona ba ema liu millaun rua iha mundu tomak ne'ebé halo mate liu ema rihun atus ida neen-nulu resin-lima.

Ho konxiénsia ba nesesidade atu prevene no kontrola oportunidade transmisaun ba moras iha territóriu nasionál, governu impôs medida lubuk ida ne'ebé la'ós de'it atu taka dalan ba SARS-Cov-2 atu la tama iha Timor-Leste, maibé mós prevene nia propagasaun ba populasaun ne'ebé hela iha ita nia teritoriu.

Husi medida Mitigasaun ba propagasaun risku COVID -19 ba rezidente iha territóriu nasionál, ita refere liu redusaun husi númeru funsionáriu, ajente no traballadór sira husi administrasaun pública ne'ebé nafatin iha fatin servisu ne'ebé baibain sira hala'o sira nia atividade profisionál no redusaun husi servisu atendimentu ba públiku.

Maske nune'e, ita tenke rekoñese katak, profisionál administrasaun pública balu sei continua hala'o sira nia atividade profisionál ho sira nia prezensa no ho kontaktu ho públiku sira.

Entre funcionáriu, ajente no traballadór sira husi administrasaun pública ne'ebé sei kontinua hala'ó sira nia atividade profisionál iha kontaktu ho públiku, ita tenke refere profisionál saúde sira, militar sira, ajente sira husi forsa seguransa, ajente sira husi autoridade seguransa alimentár no ekonómika, pesoal tékniku no pesoal apoiu lojístiku no pesoal ne'ebé responsável atu rekolla no transporte lixu no jestaun ba merkadu munisipál sira ne'ebé ezejuta medida sira ne'ebé governu dekretada ba prevensaun no kontrolu COVID-19.

Profisionál hirak ne'e, tanba atividade ne'ebé sira hala'ó, hetan espozisaun ba risku aas atu hetan infesaun SARS-Cov-2 no karik lakon sira nia vida tanba COVID-19. Nune'e Governu, ho razaun moral no étika, rekoñese spesifisidade ba risku husi profisionál administrasaun pública sira ne'e no determina kompensasaun ekonómika ne'ebé justu maske kondisiona husi falta rekursu finanseiru.

Nune'e, governu dekreta, tuir númeru 2 artigu 67. husi Lei n. 8/2004, husi loron 16 fulan-juñu, ne'ebé altera no pública fali husi Lei n. 5/2009, loron 15 fulan-jullu, hodi sai hanesan lei, buat tuir mai:

### **Artigu 1.º**

#### **Objetivu**

Diploma ida ne'e kria suplementu remuneratóriu ba funcionáriu, ajente no traballadór sira husi administrasaun pública ne'ebé hala'ó sira nia atividade profisionál iha servisu prevensaun ka kontrolu ba moras COVID-19 ka iha kondisaun espozisaun direta ba virus SARS-Cov-2.

### **Artigu 2.º**

#### **Suplementu remuneratóriu**

1. Funcionáriu, ajente no traballadór sira husi administrasaun pública ne'ebé hala'ó sira nia atividade profisionál iha servisu prevensaun ka kontrolu ba moras COVID-19 iha direitu atu simu suplementu remuneratóriu ida ne'ebé ho valór ne'ebé define liu husi rezolusaun Governu

nian, tuir proposta husi Primeiru-Ministru no membru governu responsável ba área finansas.

a) Valór husi suplementu remuneratóriu ne'ebé atu selu ba funsionáriu, ajente no traballadór sira husi administrasaun pública ne'ebé refere iha número anteriór bele muda tuir grau risku ne'ebé sira hetan.

2. Konsidera elejivel atu simu suplementu remuneratóriu ba prestasaun atividade profisionál iha servisu prevensaun ka kontrolu COVID-19:

a) Pesoál médiku ne'ebé hala'ó sira nia atividade iha postu fronteira, iha sentru izolamentu, prevensaun ka terapeútika ka iha estabelesimentu saúde ne'ebé halo prestasaun kuidadu saúde ba pasiente sira ho COVID-19;

b) Pesoál enfermajen ne'ebé hala'ó sira nia atividade iha postu fronteira, iha sentru izolamentu, prevensaun ka terapeútika ka iha estabelesimentu saúde nian ne'ebé halo prestasaun kuidadu saúde ba pasiente sira ho COVID-19;

c) pesoál auxiliár asaun médika ne'ebé hala'ó sira atividade iha postu sira fronteira ne'e, iha sentru izolamentu, prevensaun ka terapeútika ka iha estabelesimentu saúde nian iha ne'ebé halo prestasaun kuidadu saúde ba pasiente sira ho COVID-19;

d) tékniku análise laboratóriu ka meu komplementár diagnóstiku sira ne'ebé envolve iha atividade diagnóstiku ba COVID-19;

e) tékniku saúde pública (vijilánsia, epidemiolójika no sanitária) ne'ebé hala'ó atividade iha postu fronteira;

f) tékniku radiolójia ne'ebé envolve iha atividade diagnóstiku ba COVID-19;

- g) Motorista husi kareta ne'ebé responsavel atu tula ema ne'ebé tama iha izolamentu obrigatóriu no ema ne'ebé suspeitu infetasaun ho SARS-Cov-2 ka ba sira ne'ebé iha ona diagnóstiku COVID-19;
- h) Militar sira husi Forsas Armadas ne'ebé envolve iha operasaun ba prevensaun no kontrolu COVID-19;
- i) Ajente sira husi Polisia Nasionál Timor-Leste ne'ebé envolve iha operasaun ba prevensaun no kontrolu COVID-19;
- j) Pesoál husi Ajénsia Investigasaun no fiskalizaun ba Atividade Ekonómika, Sanitária no Alimentár ne'ebé envolve iha operasaun prevensaun no kontrolu COVID-19;
- k) Pesoál husi Diresaun Nasionál Kuarantena no Bioseguransa, husi Servisu Migrasaun no Autoridade Alfandegá nian ne'ebé dezempeña sira nia funsaun iha aeroportu, portu tasi ka iha postu fronteira rai nian;
- l) Pesoál husi Diresaun-Jerál Bee no Saneamentu no Diresaun Jerál Eletridade ne'ebé sira nia atividade bele iha risku infesaun husi SARS-Cov-2;
- m) Pesoál servisu protesaun sivil inklui bombeiru, ne'ebé sira nia atividade bele iha risku infesaun husi SARS-Cov-2;
- n) Pesoál husi Diresaun Nasionál Seguransa no Protesaun Patrimóniu Públiku, ne'ebé sira nia atividade bele iha risku infesaun husi SARS-Cov-2;
- o) Pesoál husi servisu hosi autoridade ka adimistrasaun munispál ne'ebé responsável ba rekolla, transporte no depozisaun husi lixu urbanu;
- p) Pesoál husi servisu hosi autoridade ka adimistrasaun munispál sira ne'ebé responsável ba orden públika no jestaun ba merkadu sira.

3. Konsellu Ministrus, iha kazu sira ne'ebé iha fundamentu bele fó suplementu remuneratóriu ne'ebé prevee iha n. 1, liu husi rezolusaun ne'ebé refere iha número ne'e, ba grupu profisionál sira seluk ne'e la inklui ona iha número anteriór sira ne'ebé sira nia atividade profisionál iha kondisaun espozisaun direta ba virus SARS-Cov-2.

**Artigu 3.º**  
**Finansiamentu**

Suplementu remuneratóriu ne'ebé prevee iha artigu liu ba hetan finansiamentu husi Fundu COVID-19.

**Artigu 4.º**  
**Produsaun ba efeito sira**

Diploma ida ne'e prodúz efeito desde lora 28 fulan-marsu tinan 2020.

**Artigu 5.º**  
**Tama iha vigor**

Diploma ida ne'e tama iha vigor iha lora tuir lora publikasaun.

Aprova iha Konsellu Ministrus iha lora 22 fulan-Abril 2020.

Primeiru-Ministru,

---

Taur Matan Ruak

Ministra Finanzas, interina,

---

Sara Lobo Brites

Promulga iha

Atu publika.

Prezidente Repúblika,

---

Dr. Francisco Guterres Lú Olo